

UCAPAN OLEH: Dato' Seri Dr. Mahathir Mohamad
(Perdana Menteri Malaysia)

UPACARA: Perutusan Tahun Baru Cina

TEMPAT: Pejabat Perdana Menteri

TARIKH: 27 Jan 1998

MASA:

Saya dan isteri saya mengucapkan Selamat Tahun Baru kepada seluruh masyarakat Cina Malaysia yang menyambut perayaan ini tahun ini.

Walaupun negara sedang menghadapi masalah ekonomi, saya percaya masyarakat Cina tetap dapat menyambut perayaan ini dengan aman dan penuh gembira.

Sambutan kali ini mungkin tidak semeriah tahun-tahun lalu, tetapi suasana dan semangat

menyambut perayaan itu tetap wujud. Saya percaya semua kita akan berbelanja dengan bijak

semasa hari perayaan supaya peniaga-peniaga tidak akan menghadapi masalah kerana penjualan

terlalu berkurangan sementara perayaan kita tidak terlalu terhad.

Kerajaan mempunyai cara yang akan memulihkan ekonomi negara tetapi ia memerlukan sedikit masa dan kerjasama yang rapat dari rakyat, terutama dari masyarakat peniaga. Jika kita tidak membuat apa-apa yang boleh merugikan negara hanya kerana ingin mendapat keuntungan segera bagi diri sendiri, pemulihan ekonomi akan tercapai dalam masa yang singkat. Apabila ekonomi dipulih semua pihak akan mendapat faedah daripadanya.

Saya yakin dengan kerjasama dan sokongan penuh rakyat kepada Kerajaan serta kesetiaan yang tidak berbelah bahagi kepada negara, kita akan dapat mengatasi kegawatan ekonomi ini.

Sempena perayaan Tahun Baru Cina ini, rakyat kita yang terkenal dengan semangat toleransi yang tinggi, hendaklah meneruskan tradisi kunjung mengunjung ke rumah rakan-rakan mereka yang mengadakan rumah-rumah terbuka.

Kepada kaum Cina, saya dan isteri saya sekali lagi mengucapkan Selamat Tahun Baru dan
Gong Xi Fa Cai.